

摘藻堂四庫全書薈要

集部

欽定四庫全書薈要

集部

明詩綜卷五十五

詳校官編修臣汪鏞



欽定四庫全書薈要卷二萬五百二十八

集部

明詩綜卷五十五

翰林院檢討朱彝尊編

淳二首

淳字道復後以字行別字復甫長洲人國子監

生有白陽集

張石川云白陽從遊衡山稱入室弟子有雲林之瀟灑而無其癖同

石田之高潔而通於和所謂遠性風疎逸情雲上者耶錢功甫云先生詩蕭散閒雅恬憺自然如梧桐半階月楊柳一簾風流水去無住停雲意自閒晚涼生竹塢新水溢花渠咸臻妙境



靜志居詩話白陽寫生全學
石田詩亦倣之特少神解耳

畫梅

風引上春香雪弄南枝色為有惜花心樓中莫吹笛
聞鳥

重重煙樹鎖招提野客來尋路不迷纔過板橋塵土隔
落花無數鳥爭啼

彭年一首

年字孔嘉長洲人有隆池山樵集

徐伯臣云孔嘉詩中含沈

鬱之思外被組纈之華聲調和平詞致暢越可
謂風流自命者也 王元美云彭孔嘉如光祿
宴使臣餽飭詳
整而中多宿物

詩話孔嘉人品足亞徵仲何穉孝長歌云隆
池處士彭孔嘉徵仲並軌吳人誇特詩不及

庚申秋書事

內殿傳焚廿四坊錦雲花隊一朝亡渥洼未見來天馬
槃木無聞貢白狼此日朝廷思李牧他時文簿抑陳湯
運籌急為攄長策薄伐宜城古朔方

陸治 二首

治字叔平吳縣人歲貢生有包山遺詩

詩話叔平遊道復之門當時鄉曲之論謂詩得其興
畫得其趣然叔平畫以工緻勝詩則與道復同流

治平寺納涼

竹根雨過石苔斑
鐘梵蕭然畫掩關
坐愛微涼生碧殿
忽看飛雨失青山
雲分暝色來天外
風捲潮聲落樹間
最是晚晴宜眺望
夕陽橫抹蓼花灣

桃花楊柳舞鴨圖

二月吳淞上上灘
柳絲風急絮漫漫
詩翁賦罷閒凭處

花滿春池鬪鴨闌

錢穀一首

穀字叔寶長洲人有懸磬室詩

詩話叔寶貧無典籍遊文徵仲之門日取插架書讀之以其餘力點染文墨超入逸品晚葺敝廬題曰懸磬室王元美為賦詩所云空梁頗受落月色北窗靜踈涼風眠者是也手抄異書最多至老不倦倣鄭虎臣吳都文粹續成績編間有三百卷其子功父繼之吳中文獻藉以不墜與公瑕伯穀奔走相門者遠矣

夜登虎丘次韻

遙憶梅花閣還思修竹林煙迷山徑窅雲鎖石苔深香

界期重宿筠亭擬更臨悠然停采艫燈火晚陰陰

居節四首

節字士貞吳縣人有牧豕集

詩話商谷繩削斤斤不失晚唐家數

晚坐

鴉背夕陽盡柴門暮色初山寒漸風露人語半樵漁落葉聞礧急蘆花映日疎年年楚江上不見雁將書

雨後

綠嶼青林白練溪
草深市井路全迷
雲將片雨歸何急
麥釀輕寒秀欲齊
一水遙連蕭寺外
千山不斷石橋西
欲營三徑添松菊
立盡殘陽見鳥棲

重題自畫小景贈戴子文去畫時四十年矣

點染青山四十年
寸縑不改舊風煙
散人漫竊江湖號
未買松江一釣船

村居圖

茅簷日暖燕交飛
雲過牆陰濕翠微
中酒經旬掩闕臥

蒼苔渾欲上人衣

周天球 一首

天球字公瑕長洲人諸生

中秋長干曲

玉笙低引紫簫長不許商音斷客腸聽到月斜纔入破
飛來七十二鴛鴦

王懋明 一首

懋明字僅初長洲人僑居錫山

毛氏樓居即事

為樓山郭外登眺起幽思
片雨沈江暗孤煙上嶺遲
鴈還逢寄字花發滯歸期
遠念吳山勝春遊恐後時

姚咨 二首

咨字舜咨無錫人有潛坤集

桂亭為豫章萬隱君賦

南山鬱秋霽重巒桂花白
高人愛巖棲躋攀理輕策
覽彼雲木秀悠然縱所適
結亭青林端幽賞非矯迹
冷風

吹霞裾涼月挂石壁襲芳和天倪餌實駐顏色淮南詎
可招此意良自得願貽瑤華音一慰山中客

西樓席上聽梨園琵琶戲贈

少年文采復風流適意湖山竟日留老去不忘歌舞興
琵琶猶載木蘭舟

周詩一首

詩字以言崑山人有虛巖集

皇甫子循云山人詩
婉麗以會景俊逸以

宣情春容以達氣真得古人之髓
周以言如中智芘芻雖乏根具不至出小乘語

詩話虛巖頻與皇甫昆弟酬和故派亦近之其言云詩之淵妙近體難工而鮮叛選體易似而實離倩衣毛嬙借飾西子始勞髣髴終露本來作者既非匠心覽者又皆庸目乃曰甲幾魏晉乙庶齊梁是何古人之多也斯言可鍼卮言詩藪之膏肓

靈隱寺

靈隱何年寺青山向此開
澗流元不斷峰石自飛來
竹覆空王苑花藏大士臺
冥探有玄度莫遣夕陽催

唐詩二首

詩字子言無錫人有石東山房橐

九日登牛首山

牛首登高處黃花細雨前山深寒似臘江遠澹於煙寶
刹珠光淨金陵王氣連六龍曾駐輦聽話武皇年

采蓮曲

風微波不起日暮未迴船貪看鴛鴦鳥時時誤采蓮

沈仕一首

仕字子登杭州人刑部侍郎銳子自號青門山

人王道思云青門樂府古詞雜詠遊適之作麗
而有則風致藹然邊關諸詩意氣激發於聲

律之外殆雄心俠氣有不能自釋者邪
伯云青門身本貴介志則清真野服山中江遊
海覽新篇雅調遠邇齊稱翰墨丹青兼能
游藝信乎野鶴之在雞羣祥麟之遊郊外

村居春日

柳堰迷丹日蓬扉啟綠煙人閒啼鳥外興劇落花前野
色連三徑山光滿四筵鸛鷀如可解堪作酒家錢

陸楫一首

楫字思豫上海人承父深蔭入國子監讀書有

兼葭堂豪

次韻送顧龍山南歸

官河春水送行舟，君去匆匆不可留。
須信故園春正好，莫因風雨駐揚州。

牟嘉叙

八首

嘉叙字寅定，黃巖人有霞溪漫稿。

趙方崖云：先生以布衣處

窮谷，游情景物能自得師於語言之外，而不越乎尺度矩矱之中。

擬古二首

驅車出門闌，車行復遲遲。
百草委霜露，涼風正淒其。
天

寒道路艱問君將何之
駕言往宛洛相從遊俠兒遊子
去萬里旋歸竟何時
安得附飄風致此殷勤辭

灌木產崇崗鬱鬱蔽層丘
芳草依澗側託蔓相綢繆
美人隔遐方宜為君子仇
未及登君堂歲月倏已邁
慨彼芙蓉花爛漫當清秋
采采欲為贈道路阻且修
願君保明哲妾心亦何尤

遊江心寺登康樂亭子

輕舸截奔浪水國散微陰
沿洄眺孤嶼寶塔凌雙岑
茲遊

夙有期始得遂幽尋淵室接梵語花臺遶龍吟泚泚元氣中
日華映珠林謝公有遺蹟孤亭俯江潯曠懷寄玄賞海嶠振
徽音清芬詎可挹高情傾古今西堂夢不返池草春自深

同方用晦遊西谷

褰裳涉西沚披莽散輕屨稍觀山川異煙火隔墟落沿洄傍
溪曲窈窕入穹壑幽尋葛可捫晻曖路疑錯巖雲冒巾幘霏
翠灑林薄汲深俯重淵采秀陟崇嶸坐聆伐木音益感良遇
樂返策復流憩逍遙展歡謔春茲丘園賞胡為就羈縛

漁家用從姪存勇韻

茅茨傍江口斷岸依漁梁榜舟蘆花渚閒歌和滄浪日
出水禽散風至蒲帆張青蓑濕不解卧看南山蒼

送馬斗南歸揚州

去年九月黃花秋邂逅與子城南遊高才磊落不易得
竟日樽酒情淹留三年為客風塵裏末路相逢即知己
禹穴探幽興未窮梁園作賦詞堪擬一別嗟余還故丘
聞君亦欲尋歸舟萍蓬蹤跡本無定使我感慨增離憂

一片孤帆向何處
日落雲橫廣陵樹
天姥峰前送月明
姑蘇臺畔聽鴻度
江煙慘淡江草青
衆賓沽酒雙玉瓶
別君惆悵不忍去
碧雲回首天冥冥

觀古壁畫山水歌

危樓百尺凌空起
古壁丹青畫山水
淨掃浮埃據榻觀
筆跡何人乃能爾
想當盤礴時
巧思妙入神
胸中羅萬象
寫出皆天真
迴峰疊嶂開
嶙峋白波浩
蕩渺無垠
仙宮闕擁出
碧雲裏
宛如三山隔
水無通津
松間白鶴

呼不下却思整翮凌蒼旻超然風景異人世四時花木相
鮮新溪林冥密碧草合又如花源有路通秦人蒼茫遠勢
尤莫測渤澥崑崙看咫尺一葉漁舟歸未歸洞庭秋淨湘
煙碧野橋沙岸曲徑通高樹下有長髯翁恍如著我圖畫
中手攜雲鏡倚青松萬籟不起千山空仰天一嘯看飛鴻

青田溪上

月出高峰潮上灘叮嚀舟子放舟還蒲帆不掛春流急
又過前溪白鷺灣

陳體文 五首

體文字仲約號寄委江陰學生有友錄橐

劉應谷云

寄委詩靡有咏
襲成一家言

詩話仲約早辭學官肆志詩律築耕舍於郊西有
田數十畝力耕而食賓至必治酒酒酣賦詩詩有
云得魚便覓酒有酒且留人如此即為樂何須復
苦貧無魚亦無酒宜主不宜賓如此即高卧何愁
不及晨可謂達生之士矣平居詩不留草其友花
左室見輒手錄之故名友錄橐五言不為舊格所
拘頗自超脫是時五岳十岳諸山人率以韋布
效縉紳語未免可憎菰蘆中有此人大是不俗

雜詩 三首

林間慈鳥鳥哺母聲鳴鳴城上雙鴝臬破巢還啄雛
鴈飽食肉勁翮翻平蕪不擊城上鴟但擊林間鳥

漢家有通儒窮經三十年腰下鮮尺組囊中無一錢出
門逢高車呵者當其前問之彼為誰牧兒新助邊

明鏡不在遠妝臺當目前只言他人媿長謂自己妍人
亦不能別鏡亦不能宣遂使效顰子翻希惑者憐

三月晦日作

造化如驅車春歸一何早本為天地客又復客中老榮

華已潛奪安得顏色好君看庭下花開者行當掃

晏起

老覺春無賴朝來起最慵鳥聲殘夢裏花氣宿醒中樓
日連城下池風過苑通却悲寒食節歲歲客江東

王 襪一首

襪字宗順泰州安豐場人處士艮仲子自號天
南逸叟有東崖遺集

詩話東崖隨父心齋之會稽傳陽明良知之學
吳興沈桐贈之詩云念子賢者後至理早已融

譬彼三世醫指授寧無從詩其餘事然如一室
風過雨三更月到窗好雨應宜早秋花不恨遲
坐雨新亭曉聞潮落月時老攜杖屢歸
山谷閒看兒孫種水田亦有活脫之趣

漫成

青春去何速白髮將奈何豈乏大藥資而不棲巖阿擾
擾苦勞生所得諒無多古人貴聞道道在焉問他

岳岱一首

岱字東伯蘇州衛人有漳餘子集

詩話東伯集交友詩為今雨
瑤華猶存次山篋中遺意

征南

安南易姓舊相因封賜還應到海濱
萬里版圖曾郡邑殊方小醜亦君臣
炎風毒霧煩諸將翠羽明珠入紫宸
想見乞降矜面縛天威此日轉陽春

方學漸一首

學漸字達卿桐城人貢生有連理堂集

詩話方氏門才之盛甲於皖口明善先生實濬
其源東南學者推為職志焉如東征句云豈謂
憑陵愁日本至勤師旅出中原宛然空同華野遺響

白雲巖

磴道斜飛瀑巖花半入雲望中孤鳥沒天外一江分竹
柏山樓色旃檀石鼎熏軒然長嘯發清興好誰聞

方學箕

一首

學箕字紹卿學漸從弟有卷石山房橐

劉慎吾贈石

怪石從何得玲瓏自可憐感君同白壁置我小窗前

張士淪

一首

士淪字心父崑山人有張氏集

送人還京

臨歧一尊酒惆悵故人違
落葉雨中滿歸舟江上稀
路將天欲遠帆逐燕同飛
去去還鄉樂無勞淚濕衣

陳鳳

三首

鳳字羽伯更字鳴岐無錫人有石邨橐

穆敬甫云山人

不務奇詭而
意象悠然

詩話明詩人同姓名者甚夥然猶世代相去字
里未同至金陵陳鳳字羽伯梁谿陳鳳亦字羽

伯兩君詩皆平平既無春城寒食之作
可別韓翃始猶兩存終愁兩湮沒耳

春夜阻舟尤村渡華子攜酒見訪

盤谷春雲覆竹扉
夜船燈火宿霏微
故人何意一樽共
野渡不堪孤鴈飛
世路波濤渾不定
客程風雨竟誰依
重來應待晴芳好
柳絮桃花滿釣磯

宿尤邨渡同李思齋

寒煙蒼蒼溪路昏
月出斷岸溪光分
孤舟畏險不復渡
兩人對酌皆成醺
苦憐白日易華髮
所喜青天無片雲

擢歌漁父杳然去縱橫野水蘆花村

雨中客至

新水柴門漲碧沙孤邨煙樹隱漁家客來湖上偏逢雨
春到江南又見花沽酒隔鄰傳小甕打魚深夜出枯槎
浮生莫遣浮名誤醉裏還驚兩鬢華

朱察卿

四首

察卿字邦憲松江華亭人有朱邦憲集

荆軻

七首無功壯士醜
函封可惜將軍首
秦廷一死謝田光
社稷何曾計存否
不知秦王環柱時
舞陽在前何所為
當時太子不早遣
待客俱來事未知

對簿詩

日出雪不消
天寒日亦冷
蕭蕭枯楊下
危牆見人影
對簿慙予來
公門日延頸
囚服童僕嗤
囊空吏徒屏
懷刑媿君子
惡慝時自省
嗟彼羣凶心
持石待下井

雨中感懷

春雨久不歇春寒戀衣裳
駟馬斷委巷蝸牛蠹空牆
臥讀感舊篇惻惻各悲傷
人生貴適意所就何短長
屠狗足成名
秦龍終亦亡
虎韞腐泥沙
繭絲成文章
物理有盈虧
人情空較量
不如典春衣
沽酒澆吾腸

江南

江南千里暗妖氛
野哭家家不可聞
落日羣狐窺白骨
荒林萬馬臥黃雲
將軍不下行
師令使客空
傳祭海文
試問九重宵旰處
殿頭香氣正氤氲

吳 擴 二首

擴字子充崑山人有長吟閣橐貞素堂集

謝茂秦云

子充吐詞新
麗不減唐人

詩話子充遊大人以成名嘗於元旦賦詩懷分宜閣老其友聞之笑曰厯頭第一日懷中朝第一品官循是懷人即歲除亦輪不到吾輩此可入啟顏錄嘉靖間山人若呂中甫謝茂秦之徒排難報恩不無可取若子充所謂斗筭之人無足算也

懷伯兄

老至無家別飄零何處邊音書常不定生死竟誰傳朔

鴈驚秋思陰蟲攪夜眠空庭孤月下顧影一潸然

漂母祠

賢哉一飯恩千載猶廟食如何漢諸陵寂寞生荆棘

鄭玄撫一首

玄撫字思祈歙縣人有梧野集

折楊柳

娘娘河堤柳年年送別離攀條不忍折拭淚強相持弱
態君應惜柔情妾自知春來愁幾許試看向南枝

汪寬一首

寬字子敬祁門人

鸚鵡

被寵翻遭繫能言太逼真主恩非不厚野性詎能馴去
國長憐爾呼名輒應人江南盛雲木何似隴山春

邵正已一首

正已字格之休寧人有玄石山房草

詩話格之專精
墨務詩亦斐然

銅雀臺

寂寂銅雀望飄飄總帳懸
君王遺令日是妾斷腸年
舞影傷羅綺歌聲咽管絃
西陵松檟冷日夕鎖寒煙

吳錦一首

錦字有中休寧人有吳有中詩集

送金伯謙北行

浮雲西北征客心
渾不住到日屬秋深
寒生灞陵樹

吳瑗二首

瑗字子欽歙人

采蓮曲 二首

泚泚蘭槳鳴雙雙屬玉起不見采蓮人知在蓮花裏
采得雙蓮蓬中有百蓮子一一自生心外面空相似

吳瓊 二首

瓊字邦珍休寧人有紫芝社豪

歲暮書事

海上猶多壘江東未息兵如何觀察使遽報武功成寒

亘疑春令陰霾蔽日明不堪黃浦路雞犬寂無聲

旅邸除夕

老至謀仍拙天寒酒易消
冰霜愁裏過鄉國夢中遙
一歲祇今夜百年能幾宵
病懷堪自遣無復歎蕭條

葉一清一首

一清字本靜祁門人

王仲房云本靜詩格
稍落而意旨融洽

遣興

頗怪逢迎懶經旬不出谿州堂
一夜雨新漲忽平堤翠

篠吟風細青霞壓樹低
滄洲意不淺獨坐領鳬鷺

汪少廉一首

少廉字古矜休寧人有汪山人集

邊憤

漠南在昔王庭少內地而今戍鼓多
何將突營騎白馬
先朝失計劃紅螺虛令互市通蕃貢
翻遣降王解漢歌
獨喜郭侯曾一戰十年瀚海不揚波

程杲一首

杳字來周休寧人有大石山人藁

東原

翠竹孤村合黃花曲徑饒租完無吏過酒熟有鄰招碧
澗當門釣青山隔岸樵自慚非世用長得任逍遙

戴 巖 一首

巖字子京休寧人

得子秀兄避寇消息

問訊東吳使秋來尚避兵一身依短劒數口傍孤城旅

食應無定歸舟未有程此時正愁絕天末斷鴻鳴

程天符 一首

天符字夢甫婺源人

飲酒

昨非未皆非今是未皆是是非皆茫昧寧知譽與毀毀
於我何悲譽於我何喜時對無極翁脩然鳴綠綺

張應文 一首

應文字茂實蘇州嘉定人有巢居小橐

食新米作

人生欲無涯各各饜梁肉吾獨薄滋味一飽但饅粥屏
居事躬耕辛苦踰三伏瀰瀰白露滋粟香稻熟滌我
碌礪場納之杼與柚揚糠已隨風漬水乍離甬欣欣婦
子語足比玉田玉力穡斯有秋薦廟乃嘗穀先民戒肯
播老氏尚實腹感彼桑田巫食新詎非福

張應武一首

應武字茂仁蘇州嘉定人有文起齋集

郊居雜言

屏居兮西郊學圃兮躬稼岸崱崱兮似山水沄沄兮遶
舍鳥嚶嚶兮鳴春草萋萋兮迎夏芳菲兮及時有美不
來兮徂謝念我同學兮結珮拖紳紛車馬兮要津蓴鱸
懷兮未得援鶴怨兮無人曷歸來兮郊西劃松竹兮為
鄰晨耕兮午饁作盛世之逸民

張鑾一首

鑾字顯文萬載人多善行年九十三舉鄉飲大

賓壽百有七歲而卒

百歲作

石田茅屋野人家
百番春風換歲華
盡道長生緣辟穀
不知香飯有胡麻

范如珪一首

如珪字文瑞休寧人

江上

江上西風雨復晴
菰蒲深處釣絲輕
何人隔岸吹長笛

楊柳秋江一夜生

張良器 一首

良器字貢甫休寧人有九野豪

王仲房云貢甫詩才清思暢言

簡意微過姑蘇一首亂離在目讀之不覺悽然

過姑蘇有感

東吳城外盡烽煙
百姓流移半在船
爲問秋風舊來鴈
稻梁今剩幾家田

鄭孔庶 一首

孔庶字子富歙人

雪後東張碧川

吳橋殘雪漲新痕
客舍無人閣酒尊
不為寒梅覓春信
東風長日不開門

葉果一首

杲字杲卿休寧人

旅次江夏

歲暮投南楚蕭然一旅身
江山遙對酒鄉里少逢人
細

柳舒殘臘疎梅報早春故園歸未得物候倏更新

汪子祐

二首

子祐字受夫祁門人有石西集

吳園次云石西詞博而昌調清

而越

貧病

夜讀朝慵起晨餐午未炊邇來貧亦樂真與病相宜過
受三彭錄游憑二仲隨科頭忘日暮倚杖步雲遲

獨行

日杲秋猶暑林棲鬢欲華獨行銷白晝得意見黃花稻
熟莖莖穗薑肥寸寸芽竹堤香漸近水次有漁家

李敏一首

敏字功甫休寧人有浮丘山人集

發盤塘

朝發盤塘坳夕望平陽郭江空雨冥冥無風客帆落

郭第一首

第字次甫丹徒人隱於焦山嘗為嵩岱游有廣

篇

何元朗云次甫江月不可留山雲坐相失之句駸駸窺盛唐之室

錢塘雨泊

一片迎潮雨錢塘泊岸逢煙明六和塔雲暗兩高峰茶
熟蓬窗火香殘野寺鐘湖頭舊游路濕翠想高松

陸九州 二首

九州字一之無錫人

荆溪

東風靜卷游絲長桃花吹落流水香美人照水芙蓉裳

蘭橈玉腕擊波去欲來不來空斷腸

鍾廣漢云語皆前人已道者而其章

法却合
唐音

半山

山深翠微寒飛花亂如雨輕風抽布帆落日在高樹

張文介

四首

文介字惟守龍游人有少谷集

湖上晚興

日夕湖水佳波光皎如雪沿堤蹋花去獨行自怡悅浮

香時有無流螢乍明滅興盡擢歸舟山齋照涼月

九日風雨登吳山亭子

今日復九日自憐猶未還巖亭足佳菊風雨亦躋攀
漠煙中寺冥冥海上山鄉園渺何處空佇白雲間

遣懷

一水斜通棧羣山曲抱城短簷殘雪色遠寺暮鐘聲
茅屋仍加稅天河未洗兵空懷太平策誰問魯狂生

吳江舟中

向夕問舟人吳江將至否須傍微月中繫船好沽酒

王應辰 一首

應辰永嘉人

夜遊曲

燕舞起香塵鶯歌出絳脣直須滅銀燭恐有絕纓人

趙綱 二首

綱字希大無錫人黃勉之云希大寄李秀才二十字入唐人詩中未易辨也

黃燾車

楚人拒滎陽漢事日以亟絳灌亦何為相顧徒失色紀
生何雄哉毛骨無所惜黃蘗甘自焚赤龍乃得出如何
垓下平其功竟淪沒

寄雒陽李秀才

未得吳公薦空憐賈誼才年年三月裏相憶看花來

朱陽仲一首

陽仲以字行失其名遂寧人有青城山人集李

時

遠云文學詩聲調
意境絕類中唐

金溪曲呈方便君

金溪流水發新安一片孤帆兩岸山
估客自吹龍女笛
路人遙指玉郎灘

余慶一首

慶宇惟德固始人貢士有障風集

送吳隱君南還

可歎論交日翻成餞別時
空江憐歲晚遠道念歸遲
行色關鴻鴈鄉心挂柳枝
殷勤一杯酒相勸復相思

邊習一首

習字仲學歷城人尚書貢仲子有睡足軒詩集

王貽上云弘正四傑惟何氏之後最大李氏次之徐氏有子伯虬稱詩吳中名載今兩瑤華而仲子以尚書之胄食貧授徒有遺藁一卷薄暑不成雨夕陽開晚晴其佳句也

雨止

訪舊歸來夕照中
半天涼雨一溪風
須臾雨盡浮雲斂
笑看兒童指蟬螳

禹龍一首

龍字子化揚州興化人

九日登高

佳辰何事恨相仍
萬里高臺醉復登
淮海煙塵迷客路
濠梁烽火照皇陵
牙旗分閫原非將
羽檄徵兵却到僧
遂使英雄增激烈
不堪遲暮欲飛騰

官一變一首

一變字舜鳴平度州人官府同知有少泉詩集

九日

獨有幽懷客逢秋感慨深
菊荒三徑雨荷老半池陰
歲月人間世神仙病後心
北山高興在殊未罷登臨

張壑一首

壑字禹卿南昌人生員有白榆園橐

送仲逸同懋功太守遊滇池

滇南西去在天涯
匹馬先看楚地花
但有故人嚴僕射
杜陵隨處即為家

陸光宙一首

光宙字與嘗平湖人有鉏餘橐

詩話與嘗隱居郊園與宗旭初賜璩之璞君瑕輩一十八人結文酒之社晚夢一道士持陶靖節小像索題諦視之即已也題云在晉為淵明躬耕辭五斗昔以節自持今惟義自守千載復歸來春風吹五柳曾識白蓮人遠公是吾友蓋十八人中有白蓮道人如本也翌日復作偈言投筆而逝鄉之遺老至今傳之

歸雁

萬里衡陽雁春來又北征誰憐失羣影故作斷腸聲朔漠風猶勁關山月自明素書吾欲寄須到雒陽城

姚

寬

二首

克字叔信秀水人有玄岳山人詩集

王伯穀云山人詩清

真古澹不事藻績

興善寺訪戚希仲養疴西林禪房限韻

橋分龍藏北水接馬涇西一棹通祇苑孤筇引曲堤梅
同殘雪映竹覆濕雲低不淺陶潛興清尊許共攜

寄懷朱宗魯太醫

憶昔都城醉故人睽攜二十四迴春心隨明月長飛夢
目斷停雲欲愴神藏室書成周柱史丹箴筆紀漢宮臣

何時得副還山望芝草瑯玕共采真

詩話此贈先少保作也少保保御三朝曾撰太醫院志定陵親政後醫或進以金石劑起居未安先公入視疾奏曰聖體病在肝腎宜寬平以養氣安靜以益精帝喜命大璫陸敬書之屏斯叔信詩有丹箴句也

戴

乾一首

乾字元泉桐城人嘉靖中處士

述古

英雄一身存安有仇不報覆楚與復楚各不出所料後此博浪椎報仇志未了進為漢廷傑退偕赤松老成功

匪所期封留豈足道

鄭坤

一首

坤字順卿吳縣人有石南集

俞汝成云順卿詩賦有蕭散清逸之

風

同王駕部遊慧山題秋聲小閣

輞川居士共襟期小閣登攀欲暮時山色可淹今日酒
秋聲還憶去年詩閒雲竹掃無留影老樹藤纏不剩枝
景物慚隨人事謝隔窗幽鳥未曾知

張虞卿一首

虞卿順天人

雜詩

青青江上草，關關洲中禽。
物類各有待，因時樂相尋。
嗟予久漂泊，感遇情難任。
豈無他人好，咸非心所欽。
所思在遠道，關河阻重深。
寒暑屢變節，魚鳥空浮沈。
離憂共誰語，強坐彈鳴琴。
孤鸞與別鶴，此曲傷人心。

王叔承十四首

叔承初名光允以字行更字承父晚更字子幻
吳江人有吳越遊閩遊楚遊嶽遊諸集

詩話承父才情奔逸下筆不能自休其論詩不甚傾心王李大指謂事與景者天地所自有之物偶過而收之情與意者吾所本有之物偶觸而發之彼吾役也吾不彼役也斯言良是惜其所作牽率者什九王元美序之稱其句就而色自傳篇就而用恒有餘驟讀之恍然若新既諷之而又恍然若故王敬美序之稱其能以牛溲馬渤為藥餌嘻笑怒罵為文章蓋皆寓貶於褒之辭而承父自負其才受二美之籠絡不覺也平情而論承父亦安能敵元美即就宮詞百首而觀已遠出元美之下特其卷帙繁富不減弇州詩部爾當嘉隆間布衣稱詩若沈嘉則王百

穀及承父三人咸以多勝人今歷年未久全集
流傳日寡後世誰相知為重刊其詩者豈惟重
刊覽其全集而不欠伸思
卧者亦稀矣奚以多為

將渡江訪戚世秀阻風雲陽道中作

大江何茫茫晨風颭已夕故人如浮雲可望不可即有
夢亦須臾寤言轉悽惻生別時易徂一日三秋隔袖中
懷素書零落餘紙墨區區方寸心相看皎猶昔

自桐廬入七里瀧出嚴州舟中懷古

入瀧還出瀧宛轉千盤經既登桐君廬復憩嚴子亭水

光鴨頭綠山色蛾眉青雲中雞犬隔天際鸞鶴停往往
至人宅選勝開巖坳舊壇秘光彩遺廟虛精靈朱鳥不
可見哀歌許誰聽

題陳從訓所藏惠崇溪山春霽圖卷

惠崇一詩僧宋首柴周尾丹青入禪觀別自通玄理能
於尺素間點染千山水昨登金焦興不孤陳郎示我溪
山圖畫家精工多近俗寫意得神形不足此僧妙趣種
種兼不滿三尺吳興練針頭毫末密相接有如螭蟠寄

蚊睫或言工勝趙大年又云妙超展子虔只須三日坐
其下一花一草生意全乃知陳郎揮灑信有本恥與當
今畫家混我歌長句君莫嗤惠崇惠崇郎所師

水北菴醉歸書興

水深肥紫蟹稻熟美黃雞溪饌秋來賤酒人間處齊醉
歸廬嶽社惱殺太常妻點檢明朝約野橋烟樹西

屯溪乘竹筏抵紋溪作

綠竹揚輕筏屯溪渡早暉魚梁羣鷺下石碓亂泉飛小

市環青麓長橋跨翠微前峰仙路近樹色滿秋衣

金陵豔曲

綠江天作塹翠嶺石為城柳暗黃金塢花明白玉京春
風十萬戶戶戶有啼鶯

揚州歌 二首

二十四橋邊當壚最可憐妝成窺客坐不耐數青錢
東家女十三西家女十五夜半寒娘啼嫁與并州估

益卿簡寄家兄酒錢志感

異姓憐兄弟天涯寄酒錢急難那得汝我媿鵲鴿篇

觀音巖訊蘇道人適山頭虎過

層巖飛茗煙道人正高坐牧童折山花笑指神虎過

西湖雜興

看花須近寒食看潮待過中秋二月十五花信八月十
八潮頭

荆溪雜曲 二首

賣殘竹筍筍還來收罷蘭花蕙又開但焙茶芽先穀雨

不愁虎跡遍莓苔

蜀山山下火開窑
青竹生煙翠石銷
笑問山娃燒酒杓
砂坏可得似椰瓢

竹枝詞

白鹽出井火燒畬
女子行商男作家
幢布紅衫來換米
滿頭都插杜鵑花

黃姬水

一首

姬水字淳父長洲人
省曾子有白下高素二集

王元美云黃淳父如北里名姬作
酒糾才色既自可觀時出俊語

送汪太學遊江都

千里王孫歸未能風雲意氣每超騰
年來裘馬遨遊處不是金陵即廣陵

王穉登

十二首

穉登字百穀一字伯固長洲人國子監生有晉
陵金昌燕市客越青雀竹箭梅花什荆溪松壇

諸集

詩話百穀詩亦華整第嫌肉勝於骨至素文榮
所賞色借相公袍上紫書生薄命原同妾等句
媚竈之詞近於卑田乞兒語矣列朝詩集甄錄
太繁予刪其什九而風骨始刻露嘗鼎一臠未
為不知味也

送吳郎遊金陵

兩地三春別孤帆千里愁君今遊帝里誰與共仙舟夜
雨連瓜步春潮滿石頭長干管絃地走馬莫淹留

送慧師還五井兼懷其故師楊伯翼

持鉢南歸去長天接遠汀未霜吳樹赤過雨越山青帆

外桃花渡函中貝葉經還將二泉水一酌子雲亭

婁東訪顧靖甫

訪爾山城下秋風一徑偏溪魚名箭鏃野菊類金錢草
廢歸吳宅潮通入楚船馬鞍峰頂石把酒憶當年

看梅過玄墓山中

橋外花開日分明雪作圖不將他樹雜未有一家無多
處半青嶂香時過太湖濁醪元易得市遠亦須沽

送吳中丞之金陵

建業青山是帝都
暫勞開府握軍符
花間朱鷺鏡歌曲
江上黃龍水陣圖
玉節中丞新盪寇
樓船諸將舊平吳
不知燕子磯前地
容得陳琳草檄無

邊警

琵琶洲上香山澳
來往初通海上艖
漸習文書通漢語
別居城郭慕中華
餘甘却載西商舶
吉貝先歸市令家
島寇須防勾引漸
斧柯莫待翦萌芽

長安春雪曲

春風吹雪下桑乾
添得城中一夜寒
鵲樓高消不盡
長安街上馬頭看

都下寒食

騎馬尋春春尚遲
東風空自向人吹
燕王城裏千株柳
寒食來看未有絲

望湖亭

亭邊楊柳水邊花
落日行人正憶家
不及江南湖上寺
木蘭舟小載琵琶

湖上梅花歌 二首

山煙山雨白氤氲
梅蕊梅花濕不分
渾似高樓吹笛罷
半隨流水半為雲

虎山橋外水如煙
雨暗湖昏不繫船
此地人家無玉厯
梅花開日是新年

清明前一日慈雲菴訪怡菴上人

春風駘蕩日初晴
與客尋僧入化城
牆裏杏花牆外柳
始知佳節近清明

梁辰魚 二首

辰魚字伯龍崑山人有遠遊橐

詩話伯龍雅擅詞曲所撰江東白苧妙絕時人
時邑人魏良輔能喉轉音聲始變弋陽海鹽故
調為崑腔伯龍填浣紗記付之王元美詩所云
吳閶白面冶游兒爭唱梁郎雪豔詞是已同時
又有陸九疇鄭思笠包郎郎戴梅川輩更唱迭
和清詞豔曲流播人間今已百年傳奇家曲別
本弋陽子弟可以改調歌之惟浣紗不能固
是詞家老手詩律猶未細摘能駢贍而已

登西塞山訪張志和遺跡

晚登西塞山脩然出林薄諸峰自南來茲嶺獨窄窄攀

援上蘿磴翠微構蘭若清楚懸香林法鼓時間作零雨
飄巖阿殘雲卧松閣緬懷元真子雅志甘寂寞雲鴻入
冥冥孤飛避繒繳風雨湖上歸浮名寄蓑笠斯人邈千
載高風滿寥廓伊余慕肥遯世故還束縛名境雖盤桓
猶未諧宿諾何時返初服於焉此棲託

夏日泛舟荆溪暮宿湖口

五月荆溪上驚湍走白沙風檣歌聽燕浪楫遠衝花山
勢通吳直溪流向月斜維舟見漁火深樹有人家

秦嘉禾 二首

嘉禾字吾田桐城處士自號大龍山人有彭澤豪

小孤山

砥柱從開闢中流自古今神龍常在窟怪木不成林絕
頂雲流影懸崖鳥過音吾題百丈壁仙跡倘相尋

汎湖

汎汎楓湖十里中薄雲細浪夜初融月明會聽雙龍起
我欲騎之到海東

汪坦

坦字仲安鄞縣人國子監生有石盂集

夜上嚴灘

上灘似牽竿下灘如走馬灘高月未出亂石怒流瀉離
離巖際星風雨聲在下夜久漁火明疑是披裘者

林兆恩

一首

兆恩字谷子莆田人

詩話林谷子李卓
吾閩中二異端也

題室

茫茫天地一閒身
寄跡榕州今幾春
日暮潮平沙欲合
隔江還有未歸人

徐韋

二首

韋字明佩江陰人國子監生有觀夢菴集

重經故居

荒臺歌側柳凋零
故里重過悵獨行
燕子不來花落盡
夕陽偏傍斷橋明

過復元從孫

銀蠟風多護錦屏
飛觥不逐舞腰停
當筵莫唱江南曲
白髮周郎已倦聽

董宜陽

一首

宜陽字子元自號紫岡山樵上海諸生

初發谷陽夜泊追懷舊游寄袁魯望

不寐嫌宵永殘星帶月明
城烏喧夜柝岸葉亂秋聲
世路悲今昔存亡念友生
淒涼感舊賦轉見古人情

汪淮

淮字禹乂休寧人有蘿山詩藁

聞報懷族孫時元

聞道東南寇烽煙處處昏
倉皇悲客子流落向江邨
野曠雲迎陣人稀晝掩門
更誰如漂母一飯識王孫

沈倬

五首

倬字道章吳江諸生以子琦琬珣貴累贈通奉

大夫有紀志藁

松際月

清風湖上來徐徐入松下風吹松子落拾之欲盈把月
出松際雲清光滿籬舍

題張師清望樓

曉色臨平野高樓屬斷雲連峰當戶入一水傍階分樹
影參差動禽聲下上聞主人方擁傳莫草北山文

送別

空城積雨煙霧深驛亭迢遞江沈沈桃花一樹感春淚

楊柳萬條驚別心
燕趙古來多結客
秦淮道上誰知音
丈夫意氣偶相得
脫贈豈惜雙南金

月夜

明月吐夜光
寒影在溪水
山人抱琴來
坐久秋雲起

花溪客舍

孤燈坐來昏
淒其不成宿
夜鶴忽驚栖
翻飛入修竹

卓明卿

一首

明卿字徵甫
仁和人以太學生選授光祿寺署

丞有集

葉茂長云徵甫詩華
瞻和暢才調過人

江上別黎惟敬

執手河橋上遙天起片雲
仙帆千里發客路一江分
桂嶺先秋色樟亭半夕曛
家山到何日兩地惜離羣

陳九州一首

九州字維同江陰縣學生

夜泊荆溪

細柳湖邊岸青蒲水上舟
星隨孤月動山入暝煙收鼓

柰聞漁浦懸燈見佛樓客途春欲盡歸思滿滄洲

王逢年 一首

逢年字舜華初名治字明佐崑山人同祖之子

諸生有海岱集

王元美云明佐縣
麗宏博纚纚不竭

秋曉聞鴈

北斗橫天秋夜闌朔雲遙度鴈聲寒夢回旅館燈初落
書寄衡陽葉未殘隱隱斷行迷極浦蒼蒼斜月帶長安
湘南塞北關情遠人倚青樓幾處看

汪時元一首

時元字惟一休寧人

九日舟中

秋風葉正飛江上逢重九人世幾登高寂寞黃花酒

青周

士云詩有不必深言而選家必錄者此作是也

袁景休 三首

景休字孟逸吳縣人

詩話孟逸隱於卜肆歿後閩人林古度寓法水寺見孟逸夫婦停棺於寺傷其無子取摺疊扇畫兩

棺貯破屋中上雨旁風極悽慘之狀題詩其上有新安客見而憫之出私錢庀宅窆古度又口授遺詩刻之成集余購之不得繡谷蔣氏藏孟逸墨蹟五翻凡十絕句亟錄三首孟逸夙見知於沈嘉則其選嘉則詩云道上霜寒連白鴈馬頭木落見黃河殊有爽氣宜其訕笑詆譏及劉子威侍御也

入慧慶寺

新秋入古寺涼風何清越樹杪夕陽微山蟬鳴不歇

春日過南城

黃鳥當三月城南景正繁桃花千萬樹不異武陵源

自江村望虎丘

茲山竒且麗迴與江村合幽人去復來斜陽在孤塔

王受甫 一首

不知何許人詩載素中道游居錄

題九山壁

一心貪與白雲期解帶歸來任所之每過名山經月住


蘇門山上更多時

素小修云九山去輝縣十里有斧
劈石石上題詩後云嘉靖癸卯受甫

不知何人



明詩綜卷五十五



總校官庶吉士

臣

張能照

校對官庶吉士

臣

嚴福

膳錄監生

臣

陸學稼